

ხელშეკრულება „აგრო სტიპენდიის“ ნომინაციების ფარგლებში
თანამშრომლობის შესახებ

№ 01-08-15/1240-2023-2

ქ. თბილისი

12 დეკემბერი 2023 წელი

ერთი მხრივ, საქართველოს გარემოს დაცვისა და სოფლის მეურნეობის სამინისტროს სსიპ გარემოსდაცვითი ინფორმაციისა და განათლების ცენტრი (შემდგომში - „ცენტრი“), წარმოდგენილი მისი დირექტორის თამარ ალადაშვილის სახით და მეორე მხრივ, სსიპ საქართველოს ტექნიკური უნივერსიტეტი (შემდგომში - „უნივერსიტეტი“), წარმოდგენილი უნივერსიტეტის ადმინისტრაციის ხელმძღვანელის კარლო კოპალიანის სახით, დებენ წინამდებარე ხელშეკრულებას შემდეგზე:

მუხლი 1. ხელშეკრულებაში გამოყენებულ ტერმინთა განმარტება:

ცენტრი - საჯარო სამართლის იურიდიული პირი გარემოსდაცვითი ინფორმაციისა და განათლების ცენტრი;

უნივერსიტეტი - საჯარო სამართლის იურიდიული პირი საქართველოს ტექნიკური უნივერსიტეტი

სტუდენტი - სსიპ „საქართველოს ტექნიკური უნივერსიტეტი“-ს სამაგისტრო, საბაკალავრო და პროფესიულ საგანმანათლებლო პროგრამაზე ჩარიცხული, აქტიური სტუდენტის სტატუსის მქონე პირი;

სტიპენდია - აგრარული დეფიციტური პროფესიების ხელშეწყობის მიზნით გამოყოფილი „აგრო სტიპენდია“, სამაგისტრო პროგრამის სტუდენტზე 1500 (ათას ხუთასი) ლარი, ხოლო საბაკალავრო პროგრამის სტუდენტზე 1000 (ათასი) ლარი (საქართველოს მოქმედი კანონმდებლობით დადგენილი ყველა გადასახადის ჩათვლით);

კონკურსი - „აგრო სტიპენდიის“ მისაღებად უნივერსიტეტის მიერ დადგენილი წესის შესაბამისად გამოცხადებული შესარჩევი ეტაპი.

მუხლი 2. ხელშეკრულების საგანი

აგრარული დეფიციტური პროფესიების ხელშეწყობის მიზნით, „აგრარული განათლების ხელშეწყობი აქტივობების განხორციელება, როდესაც გაეროს განვითარების პროგრამა (UNDP) უზრუნველყოფს მხარდამჭერ მომსახურებას საქართველოში პროფესიული განათლებისა და ტრენინგების (VET) სისტემის მოდერნიზაციის პროექტისთვის“ შეთანხმების ფარგლებში, ცენტრის მიერ უნივერსიტეტის აგრარული მეცნიერებებისა და ბიოსისტემების ინჟინერინგის ფაკულტეტის სამაგისტრო პროგრამის 2 (ორი) და ბაკალავრიატის პროგრამის 2 (ორი) სტუდენტისათვის სტიპენდიის დაწესების მიზნით, წინამდებარე ხელშეკრულების მე-8 მუხლში მითითებულ უნივერსიტეტის ანგარიშზე 5 000 (ხუთი ათასი) ლარის ოდენობით (საქართველოს მოქმედი კანონმდებლობით დადგენილი ყველა გადასახადის ჩათვლით) თანხის ჩარიცხვა.

მუხლი 3. მხარეთა უფლება-მოვალეობები

3.1 უნივერსიტეტი ვალდებულია:

3.1.1 სტუდენტებზე სტიპენდიის გაცემის შესახებ გადაწყვეტილება მიიღოს შემდეგი სავალდებულო კრიტერიუმების/მოთხოვნების გათვალისწინებით:

ა) დაუშვებელია სტიპენდიის მისაღებად კონკურსში იმ სტუდენტის მონაწილეობა, რომელსაც შეჩერებული აქვს სტუდენტის სტატუსი;

ბ) სტუდენტს სამაგისტრო პროგრამაზე სწავლის პროცესში დაგროვებული უნდა ჰქონდეს არანაკლებ 30 (ოცდაათი) აკადემიური კრედიტი და მისი საშუალო სარეიტინგო ქულა არ უნდა იყოს 81-ზე ნაკლები;

გ) სტუდენტს საბაკალავრო პროგრამაზე სწავლის პროცესში დაგროვებული უნდა ჰქონდეს არანაკლებ 60 (სამოცი) აკადემიური კრედიტი და მისი საშუალო სარეიტინგო ქულა არ უნდა იყოს 81-ზე ნაკლები;

დ) უპირატესობა მიანიჭოს უფრო მაღალი ქულების მქონე სტუდენტს;

ე) სტიპენდიის გაცემისას უპირატესობა მიანიჭოს იმ სტუდენტებს, რომლებსაც წარდგენილი აქვთ სამეცნიერო ნაშრომი საუნივერსიტეტო კონფერენციაზე და დაიმსახურეს მაღალი შეფასება;

ვ) სტუდენტმა უნდა წარადგინოს პროგრამის ხელმძღვანელის სარეკომენდაციო წერილი;

3.1.2 სტუდენტზე სტიპენდიის გაცემის შესახებ გადაწყვეტილება მიიღოს არაუგვიანეს 2023 წლის 17 დეკემბრამდე.

3.1.3 სტუდენტზე სტიპენდიის გაცემის შესახებ გადაწყვეტილების მიღებიდან დაუყოვნებლივ აცნობოს გადაწყვეტილება ცენტრს.

3.1.4 ცენტრის მიერ სტიპენდიის თანხის ჩარიცხვიდან 10 დღის ვადაში გასცეს სტიპენდიის თანხა სტუდენტზე და სტიპენდიის გაცემიდან მომდევნო დღეს მიაწოდოს სტიპენდიით გათვალისწინებული თანხების გაცემის შესახებ დოკუმენტაცია ცენტრს.

3.1.5 ხელშეკრულების მოქმედების ვადის გასვლამდე, ცენტრის ანგარიშზე დააბრუნოს გადარიცხული თანხის ის ნაწილი, რომელიც არ გაიცა სტუდენტებზე სტიპენდიის სახით.

3.2 უნივერსიტეტი უფლებამოსილია:

3.2.1 მოითხოვოს ცენტრისგან ხელშეკრულებით გათვალისწინებული თანხის ჩარიცხვა.

3.2.2 მოითხოვოს ცენტრისგან მასთან ჩარიცხული თანხების შესახებ დეტალური ინფორმაცია.

3.3 ცენტრი ვალდებულია:

3.3.1 ჯეროვნად და კეთილსინდისიერად შეასრულოს ნაკისრი ვალდებულებები.

3.3.2 უნივერსიტეტის მიერ წინამდებარე ხელშეკრულების 3.1.3 პუნქტით გათვალისწინებული ინფორმაციის მოწოდებიდან ერთი თვის ვადაში უზრუნველყოს 5 000 (ხუთი ათასი) ლარის გადარიცხვა ხელშეკრულების მე-8 მუხლში მითითებულ უნივერსიტეტის ანგარიშზე.

3.3.3 უნივერსიტეტის მოთხოვნის შემთხვევაში, შესაძლებლობის ფარგლებში, უზრუნველყოს სტუდენტების სტაჟირების და პრაქტიკის გავლა ცენტრში ან/და საქართველოს გარემოს დაცვისა და სოფლის მეურნეობის სამინისტროს შესაბამის უწყებებში.

3.4 ცენტრი უფლებამოსილია:

3.4.1 მოსთხოვოს უნივერსიტეტს ვალდებულებების ჯეროვნად შესრულება.

3.4.2 მოითხოვოს სტიპენდიით გათვალისწინებული თანხების გაცემის დამადასტურებელი დოკუმენტაცია.

მუხლი 4. მხარეთა პასუხისმგებლობა და დაუძლეველი ძალა

4.1 მხარეები ვალდებულები არიან, კეთილსინდისიერად და სრულად, ხელშეკრულების პირობებისა და საქართველოს კანონმდებლობის სრული დაცვით, შეასრულონ ხელშეკრულებით ნაკისრი ვალდებულებები.

4.2 მხარეები პასუხს აგებენ ხელშეკრულებით გათვალისწინებული ვალდებულებების შეუსრულებლობასა და არაჯეროვნად შესრულებაზე საქართველოს კანონმდებლობის შესაბამისად.

4.3 მხარეები თავისუფლდებიან პასუხისმგებლობისგან ვალდებულებების სრული ან/და ნაწილობრივი შეუსრულებლობისათვის დაუძლეველი ძალის მოქმედების შემთხვევაში, რომლის დროსაც შეუძლებელია წინამდებარე ხელშეკრულებით გათვალისწინებული ვალდებულებების შესრულება.

4.4 „დაუძლეველი ძალის“ ქვეშ იგულისხმება გარემოებები, რომლებიც არ არსებობდნენ და რომელთა გათვალისწინება მხარეებს არ შეეძლოთ წინამდებარე ხელშეკრულების დადების დროს, ასევე რომელთა დადგომა, ზემოქმედების თავიდან აცილება და გადალახვა მხარეებს არ ხელეწიფებოდათ, კერძოდ: წყალდიდობა, დიდთოვლობა, მიწისძვრა, აფეთქებები, ხანძარი, ავარია, ემბარგო, ომი და საომარი მოქმედებები, ბლოკადა, გაფიცვები, კანონმდებლობის ცვლილებები, რომლებიც აუარესებენ წინამდებარე ხელშეკრულების მხარეების სამართლებრივ სტატუსსა და რეჟიმს და სხვა გარემოებები.

4.5 ამ მუხლის 4.4 პუნქტით გათვალისწინებული დაუძლეველი ძალის მოქმედების მთელ პერიოდში, მხარეები მიიღებენ ყველა აუცილებელ ზომას, მაქსიმალურად შეამცირონ ის დრო, რომლის განმავლობაშიც შეფერხებულია ვალდებულებ(ებ)ის შესრულება.

4.6 მხარე, რომელიც მიუთითებს დაუძლეველი ძალის გარემოებაზე თავისუფლდება პასუხისმგებლობისგან იმ ფარგლებში, რომლებშიც მას ხელი შეუშალეს დაუძლეველი ძალით გამოწვეულმა გარემოებებმა. ამასთან, იგი არ თავისუფლდება ამ ხელშეკრულების იმ სხვა ვალდებულებათა შესრულებისგან, რომელთა შესრულებასაც ხელს არ უშლის დაუძლეველი ძალით გამოწვეული გარემოებები.

4.7 თუ დაუძლეველი ძალის მოქმედება გრძელდება 30 (ოცდაათი) დღეზე მეტ ხანს, მხარეებმა უნდა გადაწყვიტონ წინამდებარე ხელშეკრულების ბედი. თუ მხარეები ვერ მიაღწევენ შეთანხმებას, დავა განიხილება წინამდებარე ხელშეკრულების მე-5 მუხლის შესაბამისად.

მუხლი 5. დავის გადაწყვეტის წესი

5.1 მხარეები ადგენენ, რომ წინამდებარე ხელშეკრულებასთან დაკავშირებული ყველა პრეტენზია განხილული უნდა იქნეს 15 (თხუთმეტი) კალენდარული დღის ვადაში, მხარის მიერ პრეტენზიის წერილობითი ფორმით მიღების დღიდან.

5.2 ყველა დავა და უთანხმოება, რომელიც შეიძლება წარმოიშვას წინამდებარე ხელშეკრულებიდან გამომდინარე, წყდება მხოლოდ მხარეთა შორის მოლაპარაკების შედეგად. იმ შემთხვევაში, თუ მოლაპარაკების შედეგად შეთანხმება ვერ იქნა მიღწეული 30 (ოცდაათი) კალენდარული დღის ვადაში, მაშინ მხარეთა შორის დავა გადაწყდება საქართველოს მოქმედი კანონმდებლობის შესაბამისად.

მუხლი 6. ხელშეკრულების ძალაში შესვლა

6.1 წინამდებარე ხელშეკრულება ძალაში შედის მხარეთა მიერ მისი ხელმოწერის მომენტიდან და მოქმედებს 2024 წლის 29 თებერვლის ჩათვლით.

6.2 წინამდებარე ხელშეკრულება ვადამდე შეიძლება მოიშალოს მხარეთა ურთიერთშეთანხმებით.

6.3. თითოეულ მხარეს შეუძლია მოშალოს ხელშეკრულება ამ მუხლით გათვალისწინებული წესის დაუცველად თუ მეორე მხარე არღვევს დაკისრებულ მოვალეობებს და შესაბამისმა მხარემ განუსაზღვრა მას გონივრული ვადა დარღვევის აღმოსაფხვრელად, ხოლო დამრღვევმა მხარემ ვერ უზრუნველყო დადგენილ ვადაში დარღვევის გამოსწორება.

მუხლი 7. დასკვნითი დებულებები

7.1 მხარეთა შეთანხმებით ხელშეკრულებაში შესაძლოა შევიდეს ცვლილება ან დამატება. ხელშეკრულების ნებისმიერი ცვლილება და დამატება ძალაშია მხოლოდ მაშინ თუ იგი შედგენილია წერილობითი ფორმით და ხელმოწერილია მხარეთა უფლებამოსილი წარმომადგენლების მიერ.

7.2 თუ წინამდებარე ხელშეკრულების რომელიმე დებულება გახდება ბათილი, მიუხედავად ბათილობის საფუძვლისა, ეს არ გამოიწვევს მთელი ხელშეკრულების ბათილობას. ამ შემთხვევაში ხელშეკრულების დარჩენილი დებულებები იმოქმედებს ბათილი დებულების გარეშე.

7.3 ყველა იმ საკითხის რეგულირების მიზნით, რომელიც არ არის მოწესრიგებული წინამდებარე ხელშეკრულებით, მხარეები სარგებლობენ საქართველოში მოქმედი კანონმდებლობის შესაბამისად.

7.4 მხარეთა მიერ ნაკისრი ვალდებულებებისა და ხელშეკრულების სხვა პირობების შესრულებისათვის, მხარეებმა შეიძლება დანიშნონ თავიანთი წარმომადგენლები, რომლებიც კოორდინაციას გაუწევენ ხელშეკრულებით განსაზღვრული საკითხების გადაწყვეტას.

7.5 მხარეები ვალდებული არიან იხმარონ ყველა ღონე, რათა ხელშეკრულების მოშლის შედეგად არ მიაყენონ ერთმანეთს მატერიალური ზიანი.

7.6 ხელშეკრულება შედგენილია ქართულ ენაზე, თანაბარი იურიდიული ძალის მქონე ორ ეგზემპლარად და ინახება ხელშეკრულების მხარეებთან.

მუხლი 8. მხარეთა რეკვიზიტები

სსიპ „გარემოსდაცვითი ინფორმაციისა და
განათლების ცენტრი“
ს/კ: 206351730
მის: ქ. თბილისი, მარშალ გელოვანის გამზ. N32გ
ტელ.: (032) 2 11 20 23
ელ.ფოსტა: info@eiec.gov.ge

სსიპ „საქართველოს ტექნიკური უნივერსიტეტი“
ს/კ 211349192
მის.: ქ.თბილისი 0171, მ.კოსტავას ქ.№77
ტელ.: (032) 2 77 11 11
ელ.ფოსტა: info@gtu.ge
ვებგვერდი: www.gtu.ge
ხაზინის ერთიანი ანგარიში
კოდი: TRESGE22
მიმღების ანგარიში:708977259

დირექტორი

ადმინისტრაციის ხელმძღვანელი

თამარ ალადაშვილი

კარლო კობალიანი

